

iscrìcion da Compagna inte l'albo regionale de asociaçoin de volontariato, fæto questo ch'ò ne permette de riçeive o 5% da-i sòcci e da chi veu fâlo. Tante atre cöse son stæte fæte (e peuan ese lezûe inte relaçoin morali do gran cançelê Daccà; quella de l'anno pasòu a l'é into n. 3, Luggio-Setembre 2011), ma tanto o l'aresta ancon da fâ.

Mi penso che, tra i conpiti che a neuva dirigensa a doviâ afrontâ, gh'é quello de rivalorizâ e rilanciâ a nòstra biblioteca sociale. M'aregòrdo che, quande son intròu in Compagna, de spesso s'atrovava di zoeni in biblioteca a consultâ libri e a domandâ notiçie. Òua che, graçie a-o console bibliotecâio Baglini, a nòstra biblioteca a gh'â 'n catalogo eletrònico, e quindi a rìçerca di libri a l'é façilitâ, nisciun, ò quæxi, vegne a consultâ i libri o a domandâneli in prestito. E sci che gh'émmo treimilla libri e tutti in sce di argomenti zeneixi e liguri! No solo: gh'émmo 'na coleçion de riviste locali (a cosci dita "emeroteca") quæxi unica che manco e biblioteche ciù grende gh'ân! Pe questo bezeugna portâ a l'atençion di zeneixi e rende fruibile questo patrimonio librario. Secondo mi, træ son e cöse da fâ.

A primma a l'é de quella d'avei 'na biblioteca senpre ciù ricca e ciù ben fornîa de libri in sce Zena, a Liguria, e nòstre tradiçoin e a nòstra lengoa. Pe fâlo e stradde son ste chi: vedde de fâ di scangi con atre biblioteche e atre asociaçoin da Liguria; decidde che quarche palanca a va pigiâ da-o bilancio p'acatâ di libri (magara quelli ciù antighi ò quelli che no s'ariesce a-avei pe-e atre vie); ma

sovriatutto çercâ d'avei de donaçoin da sòcci e amixi, comme àn za fæto con prodigalitæ a Maria Vietz e a Licia Oddino. Pensæ che se ogni sòccio o donesse trei libri a-a biblioteca, o numero di volummi o vegnieiva doggio! A segunda cösa a l'é quella d'intrâ into gîo de biblioteche e d'avei o catalogo in sce Internet insemme a-e atre. Pâ façile, ma semmo a Zena... Eh za, perché i mòddi de catalogaçion son diferenti pe l'Universcitæ e a Berio, ch'adeuvian o mæximo scistema, e pe-a Region, ch'a n'adeuvia 'n atro incompatibile co-o primmo! Va ben: òriâ dî che bezeugna metise li e, valutæ i pro e contra, e çerne pe-o megio.

A tersa cösa a l'é quella de garantî a consultaçion di libri e o prestito, stando atenti de no perdili.

Arivæ a questo ponto, co-in pö de publicitæ e de sciato, a nòstra biblioteca a porîa ese riconsociûa da tutti comme 'n ecelensa da nòstra Asociaçion.

Fæme dî 'n'urtima cösa. Comme se leze inta "Vitta do Sodalissio" A Compagna a l'â inandiòu 'na colaboraçion co-a Fea do Mâ; in particolare a l'é stæta presente a "Antiqua 2012" e a "Primavera 2012". Mi penso che sta colaboraçion a porîa continoâ a vantaggio da Fea e da Compagna, perché chi veu ben a Zena sa che a Fea a l'é 'na grande òcaxón pe-a çitæ. E anche sto chi o l'é 'n tascello pe fâ conosce A Compagna e pe ese, comme asociaçion de volontariato, a-o serviçio da çitæ.

Alegri!



MURR, gatto lettore © ilpigiamedelgatto. Per gentile concessione della signora Patrizia Biaghetti.